

本文清楚地表达了曹颖甫的医德思想与学术风格。

丁甘仁别传

丁君甘仁歿后，予既据生平实录，为之撰述家传。然先生良医也，以先生之绪论为予所得闻者，及今不为论次，后将无有知者矣。为作别传云。甘仁先生既卒业于其乡，初行道于苏州，无所合，复东行之海上，乃大行。既而问业于汪莲石。汪令治伤寒学，于舒氏《集注》，最有心得。由是凡遇杂证，辄行规定六经，然后施治。尝谓脑疽属少阴，发背属太阳，皆不当误投寒凉，此其大较也。又善易理。尝语予曰：夏至一阴生，易象为姤嗣，是阴气渐长，中阳渐虚，阳散于外，阴守于内。设持循而不乱，足以抵御天阳，当无暑热之病。设或过于饮冷，中阳不支，乃有洞泄寒中，及寒霍乱诸证。予因是悟附子理中及通脉四逆方治。冬至一阳生，易象为复嗣，是阳气渐长，里阴渐薄，阴寒在外，伏阳在内。设固闷而不耗，足以抵御寒气，则必无伤寒重证。唯妄为作劳，阴液散亡，阴不胜阳，乃有冬温之病。予是以悟少阴有大承气及黄连阿胶方治。予曰：善。先生于治病方药，知无不言，言无不尽。其论疗毒曰：热毒暴发，头面为重，甚有朝发而夕死者，乡村求药，去城市辽远，一时不及措手，唯有速取野菊叶，捣汁饮之，渣涂患处，消肿最速。予向者于吴姓验之。又曰：凡湿毒在里之证，正当祛之出表，但既出于表，宜重用大小蓟、丹皮、赤芍，以清血分余毒，不独外疡为然，即历节风亦无不然。是说也，予近于戴姓妇人验之。又曰：凡心痛不可忍者，急用乳香、没药，酒水合煎，可以立止。是说也，予于江姓缝工验之。又尝言吴又可《温疫论》，最得仲景微旨。予问其故，先生曰：《太阳篇》云：本发汗而复下之，此为逆也；若先发汗，治不为逆。本先下之，而复汗之为逆；若先下之，治不为逆。由前之说，则伤寒之治法也；由后之说，则温病之治法也。予治夏秋之交热病，亦屡验之。今先生往矣，惜乎相见日浅，绪论无多，故即夙昔所闻者，著之于篇，